

大毘婆沙論

才八十二

三百八
退二

50524



阿毗達磨大毗婆沙論卷第八十二

退

五百人阿羅漢等造

三藏法師

玄奘奉

詔譯

結蘊第二中十門納息第四之十二

問此四無量加行云何答緣七有情而起加
行七有情者謂分欲界一切有情為怨親中
三品差別怨親二品復各分三謂下中上中
品有情揔為一種無差別故於此七品有情
境中若欲修慈先緣親品於親品中先緣上
品上品親者謂自父母軌範親教或餘隨一
可尊重處智慧多聞同梵行者於此上品親
有情境作是思惟云何當今此有情類得如
是樂然心剛強難可調伏從無始來慣習成

故於極有恩諸有情所惡阿世耶任運生長
善阿世耶雖作意起而不能住復應勇勵思
其重恩制心令住如以芥子投於錐鋒雖有
著時而難可住久習不已加行乃成由善巧
力投之方住如是行者於上品親要勤修習
與樂意樂經於多時乃得堅住於上品親與
樂意樂得堅住已次於中親復修如是與樂
意樂此既成已次於下親復修如是與樂意
樂此既成已次於中品次於下怨次於中怨
後於上怨各修如是與樂意樂漸次修習至
成滿時普於欲界一切有情與樂意樂平等
相續如於上親上怨亦亦齊此名爲修慈究

竟修悲修喜次第亦然拔苦慶慰意樂有別
云何當今此有情類離如是苦是悲意樂此
有情類得樂離苦豈不快哉是喜意樂欲修
捨時先緣中品謂於彼起捨置意樂中品有
情最易捨故緣親發愛緣怨發瞋故緣處中
初修於捨捨中品已次捨下怨次捨中怨次
捨上怨次捨下親次捨中親次捨上親先捨
其怨後捨親者瞋心易捨非愛心故漸次修
習至成滿時普於欲界一切有情捨置意樂
平等相續無異分別猶如持秤緣有情類如
揔觀林齊此名爲修捨究竟問何等有情能
修無量答有情種性略有二種一於有情樂

求過失二於有情樂求功德若於有情樂求
失者於四無量多不能修所以者何阿羅漢
等欲求其失亦可得故彼於先時亦有瑕隙
故令我等今輕毀之誰能於彼作饒益事若
於有情樂求德者於四無量多分能修所以
者何斷善根者欲求其德亦可得故彼於先
時多修善業故今感得尊貴家生形白端嚴
衆所樂見言詞威肅聞皆敬受智慧多聞人
皆推仰我應於彼作饒益事

問此四無量次第云何爲如說而生爲別有
次第有作是說如說而生謂瑜伽師先於欲
界諸有情類欲與饒益與饒益者即是慈相

故佛說慈以爲第一次於欲界諸有情類欲
除衰損除衰損者即是悲相故佛說悲以爲
第二彼諸有情既得饒益復離衰損次應於
彼而生慶慰慶慰彼者即是喜相故佛說喜
以爲第三既於有情生慶慰已次應於彼平
等捨置等捨置者即是捨相故佛說捨以爲
第四故四無量如說而生復有說者此四無
量先悲次慈次喜後捨謂瑜伽師先於欲界
諸有情類欲除衰損次復於彼欲與饒益次
復於彼深生慶慰最後於彼平等捨置尊者
僧伽筏蘇說曰悲喜二種互相制御若先起
悲次必生喜悲令心下頽喜策故若先生喜

次必起悲喜令心舉須悲制故評曰應作是
說非四無量如說而生所以者何修觀行者
隨樂生故有觀行者先起於慈次悲次喜後
起於捨廣說乃至有觀行者先起於捨次喜
次悲後起於慈或有不定有觀行者得慈悲
餘廣說乃至有觀行者得捨非餘或有不定
非四無量有順次入或逆次入或順超入或
逆超入如通解脫勝處遍處

問若未起初靜慮無量能起第二靜慮無量
不乃至若未起第三靜慮無量能起第四靜
慮無量不有說不能初靜慮無量與第二靜
慮無量爲加行門依梯登故乃至第三靜慮

無量與第四靜慮無量為加行門依梯陞故
有說亦能謂觀行者若依此地得自在力即
依此地先起無量未起下地無漏聖道尚起
上地無漏聖道況四無量而不能起問為下
地無量後起上地無量速疾為上地無量後
起下地無量速疾耶答上地無量後起下地
無量速疾非下地無量後起上地無量速疾
如學梵書後學佉盧瑟吒書速疾非學佉盧
瑟吒書後學梵書速疾問初靜慮無量無間
即能起第二靜慮無量不乃至第三靜慮無
量無間即能起第四靜慮無量不依逆次第
為問亦亦有說不能必修自地加行引發方

現前故有說亦能已熟修者起一加行或無
加行能歷諸地或上或下起無量故問慈無
量等無間即能起悲無量等不答如定蘊說
思惟何等入慈等至謂樂有情乃至思惟何
等入捨等至謂捨有情有作是說彼說無量
俱生行相復有說者彼說無量等無間緣若
作是說彼說無量俱生行相慈無量等無間
能生悲無量等若作是說彼說無量等無間
緣慈無量等無間不能生悲無量等四種加
行各有差別自加行後現在前故
應知作意略有三種一自相作意二共相作
意三勝解作意自相作意者如有思惟地爲

堅相水爲濕相火爲煖相風爲動相如是一切共相作意者如十六聖行相俱生作意等勝解作意者如不淨觀持息念解脫勝處遍處等俱生作意問此四無量於三種中爲與何等作意俱生答唯與勝解作意俱生假想起故

問且慈無量欲與他樂緣何等樂與有情耶有作是說彼緣第三靜慮中樂欲與有情生死樂中此最勝故若作是說諸有未得第三靜慮彼應不能起慈無量或有說者彼餘生中曾受第三靜慮中樂今復依止第三靜慮起宿住隨念智緣曾受樂欲與有情若作是

說諸有未得第三靜慮宿任智者彼應不能起慈無量復有說者彼緣無間所受諸樂欲與有情謂飲食樂或車乘樂或衣服樂或卧具樂或餘種種近所受樂緣此諸樂欲與有情尊者世友作如是說彼緣有情所受樂相欲令有情恒受此樂若作是說慈應不能普緣有情所以者何非諸有情皆有樂故復作是說彼緣有情起樂根相欲令有情恒受此樂若作是說慈應不能普緣有情所以者何非諸有情於一切位恒起樂根現在前故復作是說彼緣有情所受飲食車乘衣服及卧具等種種樂相欲令有情恒受此樂若作是

說慈應不能普緣有情所以者何非諸有情
皆得如是諸樂具故大德說曰先加行時緣
曾所見諸有情樂以憐愍心起勝解想欲令
一切欲界有情平等皆得如是樂具由此因
緣皆受勝樂此中意說諸瑜伽師居近村城
阿練若處於日初分著衣持鉢入近村城如
法乞食於所經處見諸有情純受勝樂謂乘
象馬輦輦等行衆寶嚴身僮僕侍衛音樂讚
詠陳列香花受極快樂如諸天子見諸有情
唯受劇苦謂無衣服頭髮蓬亂身體臭穢手
足皴裂執破瓦盂巡行乞食飢窮苦逼如諸
餓鬼見是事已速還任處收衣洗足結跏趺

坐柔軟身心令其調適離諸障蓋有所堪能
憶想先時所見苦樂於有情類等起憐愍欲
令皆受所見勝樂問所緣有情非皆得樂如
何慈觀非顛倒耶答利益意樂所等起故安
樂意樂所等起故調善意樂所等起故憐愍
意樂所等起故如理作意所等起故善根相
應故慙愧相應故自性是善故伏諸煩惱故
遠離煩惱故不名顛倒復有說者設名顛倒
亦無有失問若名顛倒應成不善答顛倒有
二種一自性二所緣具二顛倒乃名不善慈
無量觀雖有所緣顛倒而非自性顛倒故非
不善尊者世友作如是說慈無量觀雖不能

今所緣有情皆得勝樂而亦緣彼諸有情類
樂具為境故非顛倒復作是說緣諸有情樂
相為境故非顛倒復作是說修此加行能伏
瞋纏故非顛倒大德說曰如是慈觀能違瞋
心故非顛倒問此慈無量為緣一有情欲與
其樂為緣多有情欲與其樂答此慈無量初

修習時緣多有情欲與其樂摠緣有情修慈
心故後成滿已緣一緣多欲與其樂隨意自
在如慈無量問答分別悲亦應尔

如契經說慈俱行心無怨無對無惱無害廣
大無量善修習故與樂勝解遍緣一方二方
三方四方上下若豎若橫經此世間遍一切

分遍一切處一切有情慈俱行心與樂勝解
遍具足住乃至廣說問此慈無量緣諸有情
何故經說緣一方等答此經應言緣東方等
諸有情類而言遍緣一方等者於有情類以
方聲說如舉其器示器中物此經復說緣此
世間遍一切分遍一切處一切有情慈俱行
心與樂勝解遍具足住者問此慈無量緣諸
有情爲以方域邊際而觀爲以有情邊際而
觀設亦何失二俱有過所以者何若以方域
邊際觀者何故經說緣此世間遍一切分遍
一切處一切有情若以有情邊際觀者何故
非別得有情海邊際有作是說此以方域邊

際而觀問若尔善通後所設難前所設難當
云何通答應知此說少分一切謂一切言略
有二種一少分一切二一切此經但說
少分一切故不違理復有說者此以有情邊
際而觀問若尔善通前所設難後所設難當
云何通答雖無別得有情邊際而有揔得有
情邊際如四生攝一切有情無一有情非四
生攝或有說者佛以有情邊際而觀餘以方
域邊際而觀有餘師說佛及獨覺俱以有情
邊際而觀聲聞異生但以方域邊際而觀評
曰應作是說此不決定以四無量皆是假想
皆與勝解作意相應或有一切皆以有情邊

際而觀或有一切皆以方域邊際而觀

如世尊說苾芻當知我七歲中修慈心故七
歲壞劫不來生此世界壞時生極光淨世界
成已生空梵宮作大梵王威德自在於千世
界我爲獨尊復於後時來生欲界三十六反
作天帝釋於無量世作轉輪王具四種兵成
就七寶以法御世亦号法王此經所言七歲
中者佛意正說經七雨時謂昔勝時有一菩
薩名大威勇於中印度作大國王以大威恩
統攝一切然彼國土時多暑熱去城不遠有
一大林其地高涼花菓茂盛草木青翠泉池
清冷時彼國人於雨四月多捨城邑來此避

者各隨所樂作諸事業時菩薩王以國事務
及諸城邑委任大臣亦往此林居高靜處離
欲界染修四無量雨四月中無時懈廢既度
雨際節氣漸涼林中諸人各還城邑作諸事
業亦時菩薩亦從林出還詣王都設大法祀
廣修施福以諸飲食衣服香華象馬輦輦房
舍僮僕燈明卧具及醫藥等奉施沙門并婆
羅門貧病孤獨遠行羈客諸乞求者既修施
已受持淨戒如是往還經於六反至第七反
過雨際時有說壽終生極光淨有作是說壞
劫時至菩薩命終生極光淨故知七歲謂七
雨時問菩薩所修四無量定是色界繫可由

此故生極光淨及生梵天云何復作帝釋輪
王豈色界業招欲界果答菩薩今時起三無
量一欲界繫由此得作帝釋輪王二初靜慮
繫由此得作大梵天王三第二靜慮繫由此
得生極光淨天復次欲界雖無根本無量而
有無量入出定心此招輪王帝釋異熟根本
無量感極光淨或大梵王復次欲界雖無究
竟無量而有加行由此得作帝釋輪王究竟
無量能招梵王或極光淨復次欲界具有一
切善根相似種子乃至亦有相似滅定由有
無量相似善根得作輪王或天帝釋由有無
量真實善根得生梵天或極光淨復次菩薩

林中修無量故生極光淨或作梵王由還王
都設大施會作轉輪王由受持戒作天帝釋
復次此經中說三福業事謂施戒修如彼經
說苾芻當知我念過去造三種業得三種果
由彼我今具大威德所謂布施調伏寂靜布
施即是施福業事調伏即是戒福業事寂靜
即是修福業事施福業事能感輪王戒福業
事感天帝釋修福業事感大梵王或極光淨
如契經說有三種福業事一施性福業事謂
以諸飲食衣服香華廣說乃至及醫藥等奉
施沙門婆羅門等二戒性福業事謂離斷生
命離不與取離欲邪行離虛誑語離飲酒等

三修性福業事謂慈俱行心無怨無對無惱
無害廣說如前悲喜捨俱行心廣說亦亦問
色無色界有多善根何故唯說此四無量爲
修性福業事耶答世間唯於饒益他事起福
業想色無色界諸善根中無欲饒益他如四
無量者是故偏說此爲修福業事復次世於
福果起於福想諸善根中無有能感廣饒益
果如無量者是故偏說復次此四無量及所
得果堅牢難壞故獨名福如伽他說

福非火所燒

風亦不能碎

福非水所爛

能淨持世間

福能與王賊

勇猛相抗拒

不爲人非人

之所能侵奪

福終無損失

如堅固伏藏 以決定能招 此世他世樂
問非福亦非火所燒等此中何故唯說福耶
答非福雖非火所燒等而非福果爲火等壞
四無量福及所得果於去來今非火等壞
如契經說佛告苾芻妙眼弟子於諸學處若
有一切及一切種善圓滿者身壞命終生於
梵世於諸學處若有一切及一切種不善圓
滿者身壞命終或生他化自在天或生樂變
化天或生覩史多天或生夜摩天或生三十
三天或生四大王衆天或生大剎帝利家或
生大婆羅門家或生大長者家或生隨一大
富貴家生如是等諸尊勝家豐饒財寶倉庫

盈溢具大。宗葉多諸眷屬。僮僕作使。象馬輦
輦。恒受快樂。問若尔。妙眼應勝世尊。所以者何。
妙眼弟子於諸學處。善圓滿者得生梵世。不
善圓滿者生六欲天。及生人中。受富貴快樂。
世尊弟子於諸學處。善圓滿者生天。解脫不
善圓滿者。墮諸惡趣。受諸劇苦。理豈尔耶。答
不應。以佛格量妙眼。所以者何。佛弟子中最
卑小者。謂預流果。尚勝妙眼。况餘尊者。又即
世尊昔菩薩位。作梵志師。名爲妙眼。不應以
彼格量世尊。問豈菩薩時勝已成佛。答非彼
勝佛。但有別意。謂彼妙眼樂修梵住。彼諸弟
子求生梵世。故爲開示修梵住法。彼弟子中

樂修梵住若已圓滿起梵住者身壞命終生
於梵世彼弟子中樂修梵住若未圓滿起梵
住者身壞命終隨福多少生六欲天及生人
趣諸尊勝家受大快樂又彼勝時人皆純善
不修無量加行善根亦得生天人中受樂況
修無量加行善根而不生天人中受樂佛為
弟子證得涅槃制別解脫律儀學處若有弟
子不犯律儀不破學處不越軌則不踰界分
彼得生天及證解脫若有弟子犯律儀破學
處越軌則踰界分彼命終已墮諸惡趣妙眼
弟子於四梵住諸學處中修滿未滿世尊弟
子於別解脫律儀學處有持有犯彼故與佛

不應格量又彼經說今時妙眼作如是念吾
今不應與諸弟子同生一處應修上慈生極
光淨作是念已便速修起第二靜慮勝慈無
量於此命終生極光淨問妙眼菩薩既近佛
地決定應離財法二慳何緣自修第二靜慮
勝慈無量生彼上天但爲弟子說初靜慮四
梵住法令生梵世答彼觀弟子根器所宜故
但爲彼說初靜慮復次彼諸弟子是婆羅門
長夜期心希求梵世故但爲說生梵世因復
次世無佛時無有能起後三靜慮諸無量者
唯除隣近佛地菩薩問上地無量明淨勝妙
過於下地何故彼說第二靜慮名上慈耶答

觀初靜慮說彼爲上復次勝彼弟子所修無
量故名上慈復次妙眼所修是未曾得過曾
得者故名上慈復次世無佛時無有能起後
三靜慮諸無量者唯有妙眼能起第二靜慮
無量故名爲上是故尊者妙音說曰異生無
能起上三地諸無量者由佛說力世尊弟子
亦能起之問何故無量名梵住耶答梵世在
初具可得故謂未至定雖在最初而非具有
彼無喜故第二靜慮雖復具有而非最初上
地俱闕唯初靜慮梵天所居最初具有故名
梵住復次對治非梵故名梵住非梵即是欲
界煩惱初靜慮中慈悲喜捨近對治彼故名

梵住復次對治非梵行者故名梵住非梵行者
謂姪欲事初靜慮中慈悲喜捨近對治彼故
名梵住復次修梵行者身中可得故名梵住
復次梵謂世尊慈悲喜捨佛所施設故名梵
住復次梵謂梵音慈悲喜捨梵音所說故名
梵住復次修此四種得生梵天爲大梵王故
名梵住復次以四無量於梵福中最勝最尊
故名梵住問梵住無量有何差別有作是說
無有差別謂四梵住即四無量復有說者亦
有差別謂名即差別此名梵住彼名無量故
復次對治非梵名爲梵住對治戲論名爲無
量復次對治非梵行名爲梵住對治戲論行

名爲無量復次修梵行者身可得名爲梵住
離戲論者身中可得名爲無量復次對治不
信名爲梵住對治放逸名爲無量復次在梵世
者名爲梵住在上地者名爲無量復次在未
至定及梵世者名爲梵住在上地者名爲無
量復次在未至定及梵世者名爲梵住亦名
無量在上地者唯名無量復次曾所得者名
爲梵住未曾得者名爲無量復次內道所得
名爲梵住亦名無量外道所得唯名梵住復
次共所得者名爲梵住不共得者名爲無量
是故尊者妙音說曰梵住是共異生與聖者
共競此法故無量是不共聖者與異生不共

競此法故梵住無量是謂差別

佛說有四補特伽羅能生梵福云何為四謂
有一類補特伽羅於未曾立窣堵波處為佛
舍利起窣堵波是名第一補特伽羅能生梵
福復有一類補特伽羅於未曾立僧伽藍處
為佛弟子起僧伽藍是名第二補特伽羅能
生梵福復有一類補特伽羅佛弟子亦既破
壞已還令和合是名第三補特伽羅能生梵
福復有一類補特伽羅修四梵住是名第四
補特伽羅能生梵福譬喻者說如是契經非
皆佛說此中前三亦非一切皆生梵福彼所
得果不相似故謂若有人在佛生處得菩提

處轉法輪處般涅槃處起大制多衆寶嚴飾
復有餘人更於諸處聚砂石等作小制多彼
二生福豈得相似又若有人爲佛弟子造僧
伽藍高廣嚴飾如逝多林竹林大林闍林寺
等復有餘人爲佛弟子隨宜造立小僧伽藍彼
二生福豈得相似又若有人令彼天授所破
僧衆還得和合復有餘人能善和息憍餉彌
等僧鬪諍事彼二生福豈得相似故知彼經
非皆佛說亦非一切皆生梵福四梵住經是
佛所說此四梵住皆是梵福阿毗達磨諸論
師言如是契經皆佛所說此中四種皆生梵
福問彼所得果豈相似耶答所爲等故皆生

梵福謂未曾立窣堵波處爲佛世尊真實大
梵起窣堵波若大若小皆生梵福於未曾立
僧伽藍處爲佛弟子修梵行者起僧伽藍若
大若小皆生梵福佛弟子衆若大若小旣破
壞已不得同修清淨梵行若令和合還得同
修清淨梵行故和合者皆生梵福所爲旣等
故前三中事雖有異而福無別復次饒益等
故皆生梵福如修無量爲欲饒益無量有情
如是未立窣堵波處爲佛舍利起窣堵波亦
爲饒益無量有情謂於是處無量百千諸有
情類以諸香華寶幢幡蓋及伎樂等諸供養
具而供養之由此起善身語意業或種豪族

多饒財寶形貌端嚴衆所愛敬具大威德勝
善種子或種輪王及天帝釋并魔王等諸善
種子或種聲聞獨覺及佛菩提種子如是饒
益無量有情如修無量爲欲饒益無量有情
如是未立僧伽藍處爲佛弟子起僧伽藍亦
爲饒益無量有情謂於是處無量百千諸有
情類以諸飲食卧具醫藥種種資具奉施供
養或經一日或經七日半月一月或經五年
或常相續由此起善身語意業佛弟子衆由
此因緣受持讀誦思惟解說三藏文義起不
淨觀或持息念別摠念住或煖頂忍卍第一
法入正決定得果漏盡由此因緣令施主等

或種豪族廣說乃至或種聲聞獨覺及佛菩
提種子如是饒益無量有情如修無量爲欲
饒益無量有情如是和合佛弟子衆亦爲饒
益無量有情若僧破已應入見道得果盡漏受
持讀誦思惟解說三藏文義任阿練若修不
淨觀持息念等所有善品皆不得成應種三
乘菩提種者亦不能種由此三千大千世界
法輪不轉乃至淨居諸天亦有異心現起佛
弟子衆還和合時應入見道得果盡漏乃至
應種三乘種者皆能成辦由此三千大千世
界法輪復轉乃至淨居諸天皆無異心現起
如是饒益無量有情饒益等故皆生梵福尊

者世友作如是說若未曾立窣堵波處爲佛
舍利起窣堵波由四因緣能生梵福一以廣
大思願捨多財故二令無量有情種善根故
三諸所營造善究竟故四安置如身界藏故
若未曾立僧伽藍處爲佛弟子起僧伽藍由
四因緣能生梵福一以廣大思願捨多財故
二令無量有情種善根故三諸所營造善究
竟故四無所依止佛弟子衆令得依止修善
業故若僧破已還令和合由四因緣能生梵
福一捨離四種語惡行故二攝受四種語妙
行故三破壞非法故四建立正法故若有修
習四無量者由四因緣能生梵福一離違順

故二斷諸蓋故三得梵果故四繫屬梵故由
此四種皆生梵福

問此四梵福其量云何有作是說若業能招
轉輪王果齊此名爲一梵福量有餘師說若
業能招天帝釋果齊此名爲一梵福量或有
說者若業能招他化自在天王勝果齊此名
爲一梵福量復有說者若業能招梵天王果
齊此名爲一梵福量或復有說世界成時一
切有情能感世界增上果業齊此名爲一梵
福量有餘復說除近佛地菩薩善業諸餘有
情能招財富增上果業齊此名爲一梵福量
復有餘說大梵天王最初請佛轉正法輪所

得梵福齊此名爲一梵福量問梵王何時得
此梵福有作是說彼初發心欲往請佛當於
尔時即得梵福彼師不應作如是說若作是
說應未作業而便得福復有說者正請佛時
得此梵福彼亦不應作如是說正請佛時心
是欲界無覆無記無覆無記無異熟果豈名
梵福應作是說大梵天王旣請佛已還歸梵
宮世尊於後轉正法輪五苾芻衆八万諸天
皆得見諦諸神傳唱聲至梵宮梵王聞已歡
喜踊躍作是念言由我請佛轉正法輪饒益
無邊諸有情類我所應作今已作訖梵王尔
時乃得梵福評曰如是諸說一梵福量無量

無邊是廣大思所引發故

說一切有部發智大毗婆沙論卷第八十二 退

軌範

上俱水反

慣習

上俱患反

勵

音例錐鋒

上質

音追反下

瑕隙

上丘逆反

策

昌責反

梯蹬

上他

音墮反下

佉

上丘逆反

瑟吒

上所節反

煖

子同練若

音者反下

輦

上余預二音

劇

峻裂

上七旬反作

乞句

下蓋音

柔輦

上音亦作

方

域

下力反

苾芻

上頻反

楚俱

清冷

下音零

祀

音似羈

客

上居反

抗拒

上巨浪反

芻

格量

上音陌

踰

音逾萃堵

上音蘇覩

橋

上音詩

搖

上音

